

Қазақстан Республикасының Үкіметі мен Пакистан Ислам Республикасының Үкіметі арасындағы сауда-экономикалық ынтымақтастық туралы Келісім

Келісім, Исламабад қ., 1992 жылғы 24 ақпан

*** Қол қойылған күнінен бастап күшіне енді - Қазақстан Республикасының халықаралық шарттары бюллетені, 2003 ж., N 10, 64-құжат.**

Қазақстан Республикасының Үкіметі мен Пакистан Ислам Республикасының Үкіметі, бұдан былай "Уағдаласушы Жақтар" деп аталады,
- экономикалық байланыстар екіжақты қарым-қатынастарды нығайтудың маңызды да қажетті элементін құрайды деп санап,
төмендегілер туралы келісім жасасты:

1-бап

Уағдаласушы Жақтар екі елдің арасындағы ұзақ мерзімді және тұрақты сауда-экономикалық қатынастарды дамыту үшін қажетті барлық шараларды қолданады және осы мақсатта тиісті қолайлы жағдайлар туғызатын болады.

Уағдаласушы Жақтар өзара келісілген контрактілер жасасу мақсатымен салаларды зерделеуші тиісті кәсіпорындар мен ұйымдарды көтермелейтін болады.

2-бап

Уағдаласушы Жақтар сыртқы саудада бір-біріне неғұрлым қолайлы жағдай тәртібін туғызатын болады.

Дегенмен бұл тәртіп артықшылықтар беру немесе сақтап қалуға қатысты мынадай жағдайларда:

а) Уағдаласушы Жақтардың бірі шекара маңындағы сауда үшін көршілес елдерге беретін артықшылықтарға;

б) екі жақты келісімнің шеңберінде кез келген елге берілетін жеңілдіктер мен артықшылықтарға;

в) Уағдаласушы Жақтардың бірі мүше бола алатын кәдімгі одаққа немесе еркін айырбас аймағына қатысудан туындайтын артықшылықтарға;

г) қатысушы Жақтардың бірі әріптес болып отырған немесе болашақта бола алатын дамушы елдермен арадағы сауда мен ынтымақтастықты дамыту мақсатында жасалатын кез келген келісімнің шеңберінде берілетін жеңілдіктер мен артықшылықтарға байланысты қолданылмайтын болады.

3-бап

Уағдаласушы Жақтар, осы Келісімнің қағидаларын және өз мемлекеттерінің қолданылып жүрген заңдары мен нормативтік актілерін басшылыққа алып, экономика саласындағы инвестициялар үшін қолайлы жағдай жасайды.

4-бап

Өзара товарлар беріп тұру мен қызмет көрсету Уағдаласушы Жақтардың әрқайсысының заңдарына сәйкес шаруашылық қызметтің қазақ және пакистан субъектілері арасында жасалған контракттар негізінде жүзеге асырылатын болады.

Сыртқы сауданың қазақ және пакистан қатысушылары есеп айырысу мен төлемдерді еркін айналымдағы валютамен /ЕАВ/ жүзеге асырып, халықаралық саудада қабылданған ағымдағы дүние жүзілік бағалар мен шарттарды қолданатын болады.

Товарлардың түрлері мен есеп айырысу нысандарын әріптестер контракт бойынша анықтайтын болады. Есеп айырысу нысан халықаралық банк практикасына сәйкес болуға тиіс.

5-бап

Уағдаласушы Жақтардың уәкілдік берілген мемлекеттік органдары қолданылып жүрген хұқылық нормалар мен ережелерге сәйкес сыртқы экономикалық байланыстардың қазақ және пакистан қатысушылары арасында жасалатын контракттар бойынша товарлар беріп тұруға арналған лицензияларды, егер мұндай лицензиялар қажет болған ретте, уақтылы беріп отыратын болады.

6-бап

Уағдаласушы Жақтар екі ел арасындағы сауда-экономикалық қатынастарды дамыту мақсатында өзара негізде жәрмеңкелер, көрмелер ұйымдастырады, сондай-ақ сауда делегацияларымен және топтарымен алмасу үшін жағдайлар туғызады.

7-бап

Уағдаласушы Жақтар өз елдерінің заңдарына сәйкес бір-біріне екі елдің арасындағы сауда-экономикалық қызметпен шұғылданатын тұрақты өкілдіктер мен фирмалардың, кәсіпорындар мен ұйымдардың өз елдерінде құрылуын бір мезгілде шешіп береді, олардың қалыпты жұмыс істеуіне қажетті жағдай жасайды.

8-бап

Осы Келісімнің жүзеге асырылуына жәрдемдесу үшін Уағдаласушы Жақтар өзара келісімге сәйкес Пакистан мен Қазақстанда кездесіп тұратын болады. Екі жақ б а с қ а л а р ы н ы ң і ш і н д е :

а) осы Келісімді жүзеге асырудың шарттарын қарайтын;

б) осы Келісімді жүзеге асыру барысында немесе екі Жақ арасындағы сауданың дамуы барысында туындауы мүмкін проблемаларды шешуге арналған шараларды қарап, ұсынатын болады.

9-бап

Келісім бойынша Қазақстан мен Пакистаннан экспортқа шығарылатын товарлар Пакистан мен Қазақстанда өндірілуге әрі тиісінше Қазақстан мен Пакистанда тұтынылуға тиіс. Осы товарлар тиісті Уағдаласушы Жақтың келісімімен үшінші елдерге қайтадан экспортқа шығарылуы мүмкін.

10-бап

Осы Келісім оған қол қойылған сәттен бастап күшіне енеді және бес жыл бойы қ о л д а н ы л а т ы н б о л а д ы .

Егер Уағдаласушы Жақтардың біреуі осы Келісімнің қолданылу мерзімі өтерден бұрын, ең қысқа кезең 6 (алты) ай бұрын Келісімді бұзбақ ниеті туралы келесі жаққа жазбаша хабар бермейтін болса, ол бұдан былай өзінен өзі тағы да осындай мерзімге ұ з а р т ы л а т ы н б о л а д ы .

Осы Келісім күшінің тоқтатылуы осы Келісімге сәйкес жасалған контрактілердің аңғарылуына ықпал етпейтін болады.

1992 жылғы 24 ақпанда Исламабад қаласында жасалды.

Әрқайсысы ағылшын, қазақ және орыс тілдерінде екі түпнұсқа данада жасалған, әрі үш текстің де күші бірдей.

(Қолдары)